

USPJESI Osnivač i vlasnik „Svjetlosti“ prof. dr. Nikica Gabrić za „Avaz“ Operirali smo predsjednike, sportiste, holivudske glumce

U početku sam morao kupiti svu opremu, zaposliti ljude, dizati i vraćati kredite, kazao je prof. dr. Gabrić

Na velikoj svečanosti, u prisustvu 500 zvanica iz Njemačke, Švicarske, Italije, Austrije, Slovenije, BiH, Crne Gore, Sjeverne Makedonije, Kosova, Srbije i Hrvatske, u četvrtak će u Zagrebu biti proslavljen 25. rođendan Klinike „Svjetlost“, vodeće oftalmološke ustanove u regionu.

Osam dana kasnije, na kongresu s učesnicima iz 14 država svijeta bit će prezentirani dometi savremene oftalmologije.

Svjetske kompanije

Kada je, 1998. godine, osnivač „Svjetlost“, prof. dr. Nikica Gabrić, ekspert koji je u 17 država svijeta obavio desetine hiljada operacija, disciplina refraktivna hirurgija nije ni postojala. Prvi korak napravio je uz podršku profesora Krešimira Čupaka, doajena hrvatske oftalmologije, postao vlasnik prvog lasera u ovom dijelu Evrope, a onda je, kaže, sve krenulo kao u videoigri, s jednog na drugi, viši nivo.

- U početku sam morao kupiti svu opremu, zaposliti ljude, dizati i vraćati kredite. To je bilo vrlo stresno, ali sam u tome uživao. Danas više ne moram kupovati opremu, već mi svjetske kompanije daju da za njih is-

tražujem njihove prototipove i da im javljam šta treba mijenjati. Kad vas odabere „Johnson&Johnson“ ili „Schwind“, svjetski proizvođač lasera, to ne možete kupiti, ne možete biti član neke partije ili naći vezu da vam to daju - kaže Gabrić za „Avaz“.

Onda je „Svjetlost“ „upalio“ i u Sarajevu, Splitu, Banjoj Luci, Prištini, Skoplju, Subotici, Novom Sadu i Budvi.

- Neke od „Svjetlosti“ su učinile da se pomakne struka, tehnologija, ljudi, a neke, nažalost, nisu mogle slijediti vrlo stroge principe. Moj pristup u edukaciji je „trenirajte kao specijalci, jer jedan specijalac vrijedi kao 100 vojnika“. Ko kod mene završi specijalizaciju, može raditi bilo gdje u svijetu - dodaje Gabrić.

Lasersko skidanje dioptrije, ultrazvučna operacija katarakte, operacija vitrektomije, liječenje povišenog očnog pritiska, plastični i rekonstruktivni zahvati na kopcima, samo su neke od usluga dostupnih i u sarajevskoj „Svjetlosti“.

Premijeri i ministri

- Operirali smo osam predsjednika država i premijera, više od 30 ministara iz regije, tri šefa obavještajnih službi, 20-tak ambasadora, visoke dužnosnike vjerskih zajednica, šefke, vrhunske sportiste, pa do holivudskih glumaca Franka Nera (Franco), Armanda Asan-

tea (Assante), Tima Rota (Roth) ili supruge bivšeg američkog predsjednika Donalda Ivane Tramp (Trump) - ističe profesor Gabrić.

Najvećom srećom i uspjehom doživljava činjenicu što je svjetlost uspio zapaliti i kod svoje djece, doktora Ivana i Krešimira, koji će nastaviti putem na kojem on bude stao.

A. BAJRAMOVIĆ

Andeli ili šejtani

Pojašnjavajući motive koji ga pokreću, kaže da ljudi s prostora bivše Jugoslavije nikad nisu živjeli bolje, ali nikad nisu bili nesretniji.

- Pokušavam izgraditi vrijednosti koje su nematerijalne, a jedna od njih je svjetlost. Klinici nisam dao ime Gabrić, već „Svjetlost“, jer svjetlost već 13,8 milijardi


godina, otkako se desio Veliki prasak, putuje do svih nas. Završava u našem srcu, u našem srcu je ljubav, a ljubav, nakon svjetla, najviše pokreće svijet. Na jednom ramenu nam stoje anđeli, a na drugom đavoli ili šejtani. Imamo izbor - da li ćemo slušati anđele, meleke ili šejtane - dodaje Gabrić.

Kao braća


“Svjetlost” u Sarajevu radi od 2011. godine, a nakon one na Ilidži, zbog rasta broja pacijenata i uposlenih, otvorena je i posebna jedinica u Općini Centar.

- U BiH zapošljam 50 ljudi, 85 posto su Bo-

sanci, 10 posto Srbi, a samo smo jedan tehničar i ja Hrvati. I mi se tako lijepo slažemo da smo kao braća i kao najbolji prijatelji. Kad bi tako u Bosni funkcioniralo, Bosna bi cvjetala - ističe prof. dr. Gabrić.



Dr. Gabrić na jednoj od operacija



Prof. dr. Gabrić: Vrlo strogi principi